

MIHI WIREMU.

I MATE I TE RATAPU I TE 5 O MEL.

I whanau a Mihi Wiremu ki te Waimate, Pewhairangi, i te tau 1839. I te tau 1840 ka haere a te Wiremu Parata me taana whanau ki Turanga noho ai. I te taenga ki Waerengaahika i te tau 1859 ka uru taana tamahine ki te mahi whakaako i nga kotiro Maori. I mutu ra taua mahi i te raruraru i a Kereopa ma i te tau 1865, a i rere te Pihopa ki Nepia noho ai.

A. no te tau 1875 i hanga ai te Kura Kotiro Maori ki Hukarere; a ko Mihi Wiremu te tino kaiwhakahaere o taua kura. Ko taana mahi he aata whakaako i te Paipera. i nga mea pera, kia tau ai nga kotiro kia kawea ki te Pihopa whakaungia ai: tetahi mea ko te whakaako i a ratou ki te tui kakahu, ki te whatu wuuru.

Ahakoa ngoikore tonu tona tinana, kaha tonu te wairua ki taua tu mahi, ki te tautoko tonu hoki i te mahita wahine o te kura. I waiho tonu ia hei koka ki nga kotiro katoa kua tae ki te kura, a i te mea kua puta atu i te kura, kua hoki ki te kainga, mahara tonu, tuhituhi tonu ia kia ratou kei wareware ratou ki nga tikanga pai i riro i a ratou i te kura. Pera tonu ia taea noatia te ra i wera ai te kura i te tau 1910.

A i te hanganga o te kura hou, kihai ia i kaha ki te hoki-hoki tonu ki taua kura, i te tawhiti: he ahakoa ra mahara tonu ia ki aana tamariki, karanga tonu i a ratou kia haere ake ki tona whare whakaakona ai e ia.

I enei tau ka hori nei kua heke haere te kaha o tona tinana, kua ahua matapo hoki, ko ona whakaaro ia man tonu ki te iwi Maori, ki te kura hoki. Ina hoki te tuunga o nga kotiro Maori e ono tekau ma rima ki te taha o te urupa i te 7 onga ra o Mei, me ta ratou waiata i te himene, "Pumau ki te Atua." Haere e kui! Haere ki tou okiokinga!

REV. PENE TOPI.

No te 8 onga ra o Aperira i hemo ai a Rev. Pene Topi ki te Hohipera Nui i Te Kuiti. Ona tau e 56. No te tau 1907 i motuhia ai ia hei Rikona, 1911 hei Piriti. No te tau 1916 i noho ai kia Ngati Maniapoto ko tona mate i hinga ai ia he pleurisy me te pneumonia. Kotahi ano te wiki i takoto ai i te hohipera ka hemo.

He tangata tenei i arohaina nuitia e tona iwi e Ngati Maniapoto tae atu hoki ki ona hoa Pakcha. Nui atu te tangi me te pouiri o tona iwi mo tona wehenga atu i a ratou.

He kipu whakarapopototanga i nga mihi a Ngati Maniapoto ki to ratou minita, matua hoki: "Haere e te hoa